


Riba nivel internacional... Organizacion Musica ta haya sosten pa engrandece Festival di Caiso & Soca



ORANJESTAD (AAN): Cu e celebracion di e 60 edicion di Aruba su Carnaval, Minister di Turismo, Transporte, Sector Primario y Cultura Otmar Oduber conhuntamente cu Oficina di Turismo (ATA), Departamento di Cultura Aruba (DCA) y Organizacion Musica a firma un MOU cu lo apoya Organizacion Musica pa pone Fetsival di CAISO & SOCA Monarach riba pia tanto na nivel local como riba nivel internacional.

Durante e rueda di prensa diahuebs mainta Minister Otmar Oduber a indica cu musica ta un elemento hopi importante pa Carnaval di Aruba, pues motibo suficiente pa brinda apoyo na nos Festival di CAISO & SOCA Monarach.

Sr. Hildward Croes di Organizacion Musica a splica cu e musica cu ta worde produci door di compositor, arreglista y musiconan local durante e temporada di Carnaval, a demostra di no ta worde usa solamente pa e temporada di Carnaval, sino durante henter aña. Mas aun, mirando e balor di mercadeo cu e musica di Carnaval tin pa nos isla ta hacie un factor hopi importante.

Organizacion Musica ta sumamente contento cu e reconoce-

mento aki, pa loke ta trata musica y principalmente e atencion cu e Festival di CAISO & SOCA Monarch ta hayando, caminda ya caba ta premira cu e festival di e aña aki lo sobrepasa tur record cu el a yega di conoce, Sr. Croes ta bisa.

Manera Sr. Croes ta splica e apoyo financiero aki ta uno hopi importante pa por logra presenta e festival aki riba e nivel cu tanto ta desea. Ta asina cu pa por logra ehecuta un festival di e magnitud di un CAISO & SOCA Monarch, ta rekeri un logistica hopi grandi. Mas aun mirando cu esaki ta su di dos aña y cu e aña aki e lo conoce un locacion nobo cu ta Carnaval Village den curazon di San Nicolaas. Organizacion Musica lo conta cu un apoyo financiero di total 35 mil Florin pa asina aki sostene e festival di CAISO e aña aki. Meta tras di e acuerdo aki ta pa asina yuda pone festival aki back riba pia cu e intencion pa otro aña internacionaliza e esaki. Lo bay brinda e sosten pa promociona e festival aki riba nivel internacional y regional pa asina aki atrae bishitantenan pa asisti na un festival di caliber halto, haciendo di e festival di CAISO un atraccion turistico mas, ta loke Minister Otmar Oduber a indica.

Organizacion Musica na number di henter e comunidad musical di Aruba ta gradici Minister Oduber, DCA y ATA pa e gran apoyo brinda na e Festival di Aruba su CAISO & SOCA Monarch.

Gruponan participando den Carnaval 60 lo conta cu un ayudo financiero di 5000 Florin

ORANJESTAD (AAN): Den cuadro di e celebracion di Aruba su Carnaval, SAC a firma MOU cu Minister di Turismo, Transporte, Sector Primario y Cultura Otmar Oduber, Oficina di Turismo (ATA) y Departamento di Cultura Aruba (DCA), creando asina un cooperacion estrecho cu lo beneficia e 60 edicion di Carnaval.

Mirando cu Aruba su Carnaval ta un aspecto importante pa Aruba su Cultura y e balor cu esaki tin pa engrandece turismo di Aruba ta loke ta haci e 'partnership' aki uno hopi importante.

Manera Señora Tecla Kelly di SAC a splica, ta asina cu e acuerdo aki ta pa cuminsa na brinda atencion financiero na e 60 celebracion di Carnaval. Despues di Carnaval 60 lo reuni un bes mas cu tur organizacion pa conversa riba e posibilidadnan pa haya e apoyo financiero aki pa e otro añanan di Carnaval tambe.

Ta asina cu den pasado e gruponan di Carnaval hunto cu SAC a purba pa mira con pa yega na un ayudo financiero cu lo ta un aporte pa cada un grupo cu tin añanan aportando na engrandece Carnaval di Aruba, ta loke Señora Kelly ta bisa.

Pues SAC ta hopi contento cu finalmente pa Carnaval 60 e apoyo necesario a yega danki na e vision di Minister Otmar Oduber. Tambe Señora Kelly a duna un splicacion hopi mas detaya riba e ayudo financiero pa Carnaval 60 cu cada grupo por bin na remarke pa, semper y cuando cumpli cu e diferente rekisitonan.

Manera por a comprende e grupo mester ta inscribi na SAC y mester conta cu mas di 100 participante; excluyendo crew, banda musical y mayornan, e grupo mester participa na e paradanan di San Nicolas

y Oranjestad, e grupo mester ta uno completo y mester participa na un eleccion di Reina di Carnaval, tambe e mester tin un participacion na e eleccion di Prins y Pancho, tambe e grupo mester tin minimo un carosa, un roadpiece, un body- of shoul-derpiece y 100 participante. Lo bin na remarke pa e ayudo financiero segun cumpli cu e rekisitonan menciona y ta bin al caso ora di a participa na tur dos parada. Señora Kelly a duna indicacion cu e aporte financiero aki por yega na un suma total di 5000 Florin si cumpli cu tur



rekisito y si no logra cumpli cu tur 5 e grupo lo haya un subsidio dependiendo di e rekisito cu a cumpli cu ne. SAC a expresa su palabranan di gratitud na Minister Otmar Oduber, ATA y DCA pa apoya Carnaval 60 financieramente.

E firmamaneto di e MOU aki ta algo cu sigur lo keda marca den historia di Aruba su Carnaval.